



Sud Bosne i Hercegovine
Суд Босне и Херцеговине

Broj: S1 3 IŽ 048710 24 IŽ
Sarajevo, 30.07.2024. godine

Sud Bosne i Hercegovine u Sarajevu, u vijeću Apelacionog odijeljenja sastavljenom od sudija Mirsade Džindo, kao predsjednika vijeća, Dinke Bešlagić Čovrk i Hilme Vučinića, kao članova vijeća, odlučujući o žalbi političke stranke HDZ 1990-Hrvatska demokratska zajednica 1990 sa sjedištem u Mostaru, ulica Kneza Branimira 2, koju zastupa predsjednik stranke Ilija Cvitanović, izjavljenoj j protiv Odluke Centralne izborne komisije Bosne i Hercegovine broj: 05-1-07-5-795/24 od 25.07.2024. godine, o utvrđivanju odgovornosti za vođenje preuranjene izborne kampanje, u nejavnoj sjednici, održanoj dana 30. 07.2024. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, i to stavom 1. utvrđeno je da je politička stranka HDZ 1990-Hrvatska demokratska zajednica 1990, odgovorna što je na svojoj zvaničnoj web stranici www.hdz1990.ba vršila preuranjenu izbornu kampanju, čime je prekršila pravila ponašanja u izbornom periodu iz člana 7.1 Izbornog zakona BiH, pa joj je na osnovu člana 6.7 stav 2. tačka 1) Izbornog zakona BiH i primjenom člana 19.9 stav 1. tačka 3) Izbornog zakona BiH izrečena novčana kazna u iznosu od 3.000,00 KM (tri hiljade konvertibilnih maraka). Stavom 2. je određeno da će se novčana kazna uplatiti u roku od 8 dana na račun Ministarstva finansija i trezora BiH. Stavom 3. je naloženo političkoj stranci HDZ 1990-Hrvatska demokratska zajednica 1990, da sa svoje zvanične web stranice ukloni spornu objavu za koju je Centralna izborna komisija BiH izrekla novčanu kaznu, te da sve pristalice i kandidate ove političke stranke za predstojeće Lokalne izbore 2024. godine, obavijesti da su dužni da se suzdrže od javnog oglašavanja i vođenja izborne kampanje u elektronskim, online i štampanim medijima i putem društvenih mreža ili bilo kojeg oblika javnog oglašavanja kampanje prije zvaničnog početka izborne kampanje.

Protiv navedene odluke Centralne izborne komisije (u daljem tekstu CIK BiH) žalbu je blagovreno izjavila politička stranka HDZ 1990-Hrvatska demokratska zajednica 1990, u kojoj navodi sporna izjava ne može biti tretirana kao preuranjena

izborna kampanja iz člana 7.1 Izbornog zakona BiH, jer se radi o objavi nastaloj nakon održane sjednice Gradskog odbora HDZ-a 1990 Široki Brijeg na kojoj je odlučeno da kandidat za gradonačelnika HDZ-a 1990 bude gosp. Žarko Lasić. Kod nesporne objave koja sadrži samo biografske podatke o kandidatu, obrazovanju, bračnom statusu, ratnom putu i sl. , pa kažnjavanje političkih stranaka zbog objave imena kandidata CIK BiH onemogućava informisanje javnosti o radu političkih stranaka, te mogućnosti izbora između više kandidata. Kako politička stranka nije prozvala protukandidate, niti predstavila program, niti su glasači pozvani da glasaju za konkretnog kandidata, isto se ne može smatrati vođenjem preuranjene predizborne kampanje.

U odgovoru na žalbu Centralna izborna komisija Bosne i Hercegovine je predložila da se žalba odbije kao neosnovana.

Žalba nije osnovana.

Iz stanja spisa proizlazi da je CIK BiH dana 07.07.2024. godine putem e-maila alma@ccibh.org. zaprimila inicijativu za pokretanje postupka po službenoj dužnosti (prijavu) podnesenu od strane Centra civilnih inicijativa (za Koaliciju „Pod Lupom“), a koja se odnosi na kršenje odredbe člana 7.1 Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22, 67/22 i 24/24), u kojoj je navedeno da je dana 20.05.2024. godine na zvaničnoj web stranici političke stranke HDZ 1990 objavljen tekst u kojem je predstavljen kandidat ove političke stranke na predstojećim izborima, Žarko Lasić za gradonačelnika Širokog Brijega.

Žalitelj je blagovremeno dostavio izjašnjenje u kojem navodi da navedeno priopćenje ne može biti tretirano kao preuranjena izborna kampanja iz člana 7.1 Izbornog zakona BiH, jer se radi o objavi nastaloj nakon održane sjednice Gradskog odbora HDZ 1990 Široki Brijeg na kojoj je odlučeno da kandidat za gradonačelnika HDZ 1990 bude gosp. Žarko Lasić. Objava kandidature sa biografskim podacima nije jednaka vođenju kampanje.

Odredbom člana 7.1 Izbornog zakona BiH je propisano da u periodu preuranjene izborne kampanje zabranjeno je vođenje izborne kampanje u elektronskim, onlajn i štampanim medijima i putem društvenih mreža ili bilo koji oblik javnog oglašavanja kampanje. Ova zabrana ne odnosi se na organiziranje zakonitih zvaničnih skupova organa i događaja političkih subjekata u svrhe koje nisu kampanja.

Nadalje, odredbom člana 9. stav 1. Pravilnika o medijskom predstavljanju i javnom oglašavanju političkih subjekata u izbornom periodu („Službeni glasnik BiH“, broj 31/24) propisano je da u periodu preuranjene kampanje političkim subjektima je zabranjen svaki oblik radnje iz kampanje koje preduzimaju politički subjekti u periodu od raspisivanja izbora do perioda zvaničnog početka izborne kampanje. Stavom 2. istog člana propisano je da se zabrana iz stava 1. ovog člana, odnosi na upoznavanje birača i javnosti sa programom i kandidatima političkih subjekata za predstojeće izbore.

Žalbom se neosnovano ističe da sporna objava ne može biti tretirana kao preuranjena izborna kampanja, jer osim sporne objave objavljena je i slika i tekst promocije navedenog kandidata na predstojećim Lokalnim izborima 2024. godine.

Nakon uvida u kompletan spis i dostavljene dokaze (link objave od 20.05.2024. godine objavljene na web stranici političke stranke HDZ 1990 te cijeneći izjašnjenje navedene političke stranke sa dokazima, pravilno je prema shvatanju apelacionog vijeća CIK BiH utvrdila odgovornost političke stranke HDZ 1990- Hrvatska demokratska zajednica 1990 za kršenje člana 7.1 Izbornog zakona Bosne i Hercegovine.

Dakle, uz objavu kandidata za gradonačelnika HDZ-a 1990 objavljen je i tekst „Politički nisam bio aktivan u smislu bavljenja politikom, ali ideje i način vođenja su mi uvijek bili izazov za pokazivanje vlastite vještine. Stoga sam se konačno odlučio i na aktivno učešće u politici, a sve sa svrhom bolje organizacije i vođenja politike te samog života u gradu.... ključne riječi kao što su povjerenje, komunikacija i implementacija, veoma su važne za naš grad, rekao je Žarko Lasić za Borak.tv te dodao: Svi mi skupa ići ćemo naprijed samo ako naši sugrađani, odnosno svi mi budemo imali povjerenja u gradsku upravu. U svrhu toga nudimo promjene u postojećem načinu upravljanja gradom te želimo da se na prvom mjestu stavi interes građana. Sve to želim provesti kroz glavne vrijednosti koje njegujem... iz kojeg je nesporno utvrđeno da se radi o izbornoj kampanji, jer sadrži elemente izborne kampanje u smislu promocije informisanja birača u vezi kandidature Žarka Lasića za gradonačelnika Širokog Brijega, ističući njegovu biografiju, kvalitete i predstavljajući njegove ciljeve u kontekstu politike političke stranke Hrvatske demokratske zajednice 1990, što predstavlja preuranjenu izbornu kampanju.

„Preuranjena kampanja“, u smislu odredbe člana 1.1a tačka 8. Izbornog zakona Bosne i Hercegovine, je svaki oblik radnji iz kampanje koje preduzimaju politički subjekti u periodu od raspisivanja izbora do perioda zvaničnog početka izborne kampanje.

Odluka o visini novčane kazne je pravilna i zakonita jer je izrečena zbog kršenja odredbe člana 7.1 Izbornog zakona BiH u propisanom zakonskom minimumu od 3.000,00 KM (raspon propisane kazne od 3.000,00 do 30.000,00 KM), a istom će se postići svrha kažnjavanja.

Pravilno je CIK BiH žalitelju u skladu sa članom 6.5 Izbornog zakona BiH u cilju daljeg sprječavanja kršenja odredbe Izbornog zakona BiH kojim se zabranjuje vođenje izborne kampanje i javnog oglašavanja u periodu preuranjene kampanje. izrekla i privremenu mjeru naloživši žalitelju, da sa svoje zvanične web stranice ukloni spornu objavu od 20.05.2024. godine za koju je Centralna izborna komisija BiH izrekla novčanu kaznu, te da sve pristalice i kandidate ove političke stranke za predstojeće Lokalne izbore 2024. godine, obavijesti da su dužni da se suzdrže od javnog oglašavanja i vođenja izborne kampanje u elektronskim, onlajn i štampanim medijama i putem društvenih mreža ili bilo kojeg oblika javnog oglašavanja kampanje prije zvaničnog početka izborne kampanje.

Iz svih izloženih razloga ovo vijeće je osporenu odluku, ocijenilo u potpunosti pravilnom i zakonitom, slijedom čega je žalbu, primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

Predsjednik vijeća
Sudija
Mirsada Džindo